

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

Rješenje

**Prijava namjere koncentracije privrednog subjekta Lexmark, i privrednog subjekta
CEEmark**

Sarajevo
Januar 2009. godine



Broj: 01-06-26-051-7-II/08
Sarajevo, 27. januara 2009. godine

Na osnovu člana 25. stav (1) tačka e), člana 42. stav (1) tačka d), a u vezi sa čl. 12., 14., 16., 17. Zakona o konkurenciji («Službeni glasnik BiH», br. 48/05 i 76/07), a rješavajući po Prijavi namjere koncentracije privrednog subjekta Lexmark International Technology SA, 20 Route de Pre-Bois ICC Bulding Bloc A, 1215 Ženeva, Švicarska Konfederacija, podnesenoj po advokatu Seadu Miljkoviću, Fra Anđela Zvizdovića 1, 71000 Sarajevo, zaprimljenoj dana 21. novembra 2008. godine broj: 01-06-26-051-II/08, Konkurencijsko vijeće, na 81. (osamdesetprvoj) sjednici održanoj dana 27. januara 2009. godine, je donijelo

R J E Š E N J E

1. Ocjenjuje se dopuštenom koncentracija na tržištu prodaje pisača u Bosni i Hercegovini koja će nastati sticanjem većinskog udjela u osnovnom kapitalu privrednog subjekta CEEmark Ltd, 2Hill Street, St Helier, JE2 4UA, Jersey, Kanalska ostrva, od privrednog subjekta Lexmark International Technology SA, 20 Route de Pre-Bois ICC Bulding Bloc A, 1215 Ženeva, Švicarska Konfederacija.
2. Ovo Rješenje o koncentraciji se upisuje u Registar koncentracija.
3. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je zaprimilo, dana 21. novembra 2008. godine pod brojem: 01-06-26-051-II/08, Prijavu namjere koncentracije (u daljem tekstu: Prijava) privrednog subjekta Lexmark International Technology SA, 20Route de Pre-Bois ICC Bulding Bloc A, 1215 Ženeva, Konfederacija Švicarska (u daljem tekstu: Lexmark), kojom namjerava steći većinski udio u osnovnom kapitalu u privrednom subjektu CEEmark Ltd, 2Hill Street, St Helier, JE2 4UA, Jersey, Kanalska ostrva, podnesenu putem punomoćenika advokata Seada Miljkovića, Fra Anđela Zvizdovića 1., 71000 Sarajevo (punomoć izdana dana 21. novembra 2008. godine od privrednog subjekta Lexmark).

Uvidom u podnesenu Prijavu Konkurencijsko vijeće je utvrdilo da ista nije kompletna u smislu člana 30. Zakona o konkurenciji («Službeni glasnik BiH», br. 48/05 i 76/07) i čl. 8. i 10. Odluke o načinu podnošenja prijave i kriterijima za ocjenu koncentracije privrednih subjekata («Službeni glasnik BiH», broj 95/06), te je Konkurencijsko vijeće zatražilo dopunu iste, u skladu sa članom 31. Zakona (akt broj: 01-06-26-051-1-II/08 dana 17. novembra 2008. godine)

Podnosilac prijave u skladu sa zahtjevom Konkurencijskog vijeća je dopunio Prijavu traženom dokumentacijom (podnesak broj: 01-06-26-051-4-II/08 dana 19. decembra 2008. godine).

Podnosilac prijave, u smislu člana 31. stav (2) Zakona, je zatražio produženje roka za kompletiranje Prijave (podnesak broj: 01-06-26-051-2-II/08 dana 05. decembra 2008. godine), Konkurencijsko vijeće je prihvatilo zahtjeve i odobrilo produženje roka za dostavljanje tražene dokumentacije (akt broj: 01-06-26-045-3-II/08 od dana 09. decembra 2008. godine).

Nakon prijema tražene dokumentacije Konkurencijsko vijeće je utvrdilo Prijavu kompletnom i izdalo Potvrdu o prijemu kompletne i uredne Prijave, u skladu sa članom 30. stav (3) Zakona, dana 30. decembra 2008. godine broj: 01-06-26-051-5-II/08.

Podnosilac Prijave je naveo, u smislu člana 30. stav (2) Zakona, da je zahtjev za ocjenu koncentracije podnio i Komisiji za konkurenciju Republike Srbije.

Konkurencijsko vijeće u postupku ocjene dopuštenosti predmetne koncentracije je utvrdilo sljedeće činjenice:

Predmetna Prijava je podnesena u vremenskom roku od 8 (osam) dana od zaključivanja Ugovora (Izmjene i dopune Ugovora o međusobnim odnosima vlasnika udjela) između privrednog subjekta Lexmark (kupca vlasničkog udjela u privrednom subjektu CEEmark) i gospodina Rana Gila i privrednog subjekta Getter Group Ltd, zajedno sa Getter Tech Ltd, kao prodavca vlasničkog udjela u privrednom subjektu CEEmark, u smislu člana 16. stav (1) Zakona.

1. Učesnici predmetne koncentracije

Učesnici predmetne koncentracije su privredni subjekt Lexmark International Technology SA, 20Route de Pre-Bois ICC Bulding Bloc A, 1215 Ženeva, Švicarska Konfederacija (kupac privrednog subjekta CEEmark), privredni subjekt CEEmark Ltd, 2Hill Street, St Helier, JE2 4UA, Jersey, Kanalska ostrva, privredni subjekt Getter Group Ltd, zajedno sa Getter Tech Ltd. i gospodin Rana Gila.

1.1. Privredni subjekt Lexmark International Technology

Privredni subjekt Lexmark International Technology SA, 20 Route de Pre-Bois ICC Bulding Bloc A, 1215 Ženeva, Švicarska Konfederacija, osnovan u skladu sa propisima Švicarske Konfederacije, upisan u trgovački registar Kantona Ženeve (Br. Reference: 07012/1996), dana 18. jula 1996. godine, sa dioničarskim kapitalom od (..)**¹ KM (CHF (..)**).

Privredni subjekt Lexmark International Inc. Delaware je 100,0% vlasnik privrednog subjekta Lexmark.

Pretežna registrovana djelatnost privrednog subjekta Lexmark je proizvodnja, razvoj i prodaja informatičkih proizvoda (pisači i dodatna oprema), te pružanje usluga servisa za iste. Proizvodi privrednog subjekta Lexmark prodaju se u 150 zemalja svijeta.

Prema podacima iz Prijave privredni subjekt Lexmark pojedinačno ili zajedno nema više od 10,0% udjela u osnovnom kapitalu, odnosno 10,0% prava glasa u nekom privrednom subjektu u Bosni i Hercegovini.

¹ (..)** Podaci predstavljaju poslovnu tajnu, u smislu člana 38 Zakona o konkurenciji

1.2. Privredni subjekt CEEmark

Privredni subjekt CEEmark Ltd, 2Hill Street, St Helier, JE2 4UA, upisan u registar privrednih društava Komisije za finansijske usluge Jersey, Kanalska ostrva, dana 24. januara 2001. godine (broj:79149) sa osnovnim kapitalom od (..)** KM (GBP (..)**).

Privredni subjekt Lexmark ima 26,0% udjela u osnovnom kapitalu privrednog subjekta CEEmark, dok 74,0% udjela je u vlasništvu privrednog subjekta Getter Group Ltd (privredni subjekt Getter Tech Ltd 61,5% i fizičko lice Ran Gil, Agnon Street, Herzeliya 46325, Izrael imaju 12,5%).

Privredni subjekt Getter Group Ltd (raniji naziv: Isracolor Laboratories 2000 Ltd) je registrovan u skladu sa zakonima Izraela, sa sjedištem 23 Jabotinsky Road, Ramat Gat 52511, Izreal (u daljem tekstu: Getter Group).

Privredni subjekt Getter Tech Ltd. (raniji naziv: Getter Office Automation 2000 Ltd) 23 Jabotinsky Road, Ramat Gat 52511, Izreal (u daljem tekstu: Getter Tech), je registrovan u skladu sa propisima Izraela.

Privredni subjekt CEEmark isključivo djeluje na distribuciji pisača (laserskih i inkjet) i potrošnog materijala (patrone i toneri) iz ponude privrednog subjekta Lexmark.

1.2.1. Povezana društva privrednog subjekta CEEmark u Bosni i Hercegovini

Privredni subjekt CEEmark je 100,0% vlasnik udjela u osnovnom kapitalu CEEmark BH, Privredno društvo za posredovanje i usluge d.o.o. Sarajevo, Kemala Kapetanovića 12/1, 71000 Sarajevo (u daljem tekstu: CEEmark BH). Privredni subjekt CEEmark BH je upisan u registar Opštinskog suda u Sarajevu dana 25. aprila 2007. godine, pod matičnim brojem: 1-26299 s osnovnim kapitalom od (..)**KM.

Pretežna registrovana djelatnost privrednog subjekta CEEmark BH je trgovina na veliko i malo pisačima, marketing i oglašavanje.

2. Obaveza prijave namjere predmetne koncentracije

Obaveza prijave namjere koncentracije privrednih subjekata, u smislu odredbe člana 14. stav (1) Zakona, postoji ako ukupni godišnji prihodi učesnika koncentracije ostvareni prodajom roba i/ili usluga na svjetskom tržištu, iznose preko 100.000.000,00 KM, po završnom računu u godini koja je prethodila predmetnoj koncentraciji.

Ukupni godišnji prihodi privrednih subjekata učesnika predmetne koncentracije (i s njima povezanih privrednih subjekata), na dan 31. decembra 2007. godine, iznose:

Tabela 1.

KM	Lexmark		CEEmark		CEEmark BH
	CHF	KM	EUR	KM	KM
Svijet	(..)**	(..)**	(..)**	(..)**	-
Bosna i Hercegovina			(..)**	(..)**	(..)**

Izvor: podaci iz Prijave

Ukupni godišnji prihod (Tabela 1.) privrednog subjekta Lexmark iznosi (..)**KM, odnosno privrednog subjekta CEEmark (..)**KM.

Godišnji prihod učesnika koncentracije predstavlja ukupan prihod (bez poreza na dodanu vrijednost i drugih poreza koji se direktno odnose na učesnika koncentracije, na svjetskom i na tržištu Bosne i Hercegovine), u smislu člana 8. tačka h) Odluke o načinu podnošenja prijave i kriterijima za ocjenu koncentracije privrednih subjekata.

Privredni subjekti učesnici koncentracije su obavezni podnijeti Prijavu, s obzirom da su ispunili uslove, u smislu člana 14. stav (1) Zakona, koji se tiču zajedničkog ukupnog godišnjeg prihoda i da najmanje jedan privredni subjekt učesnik koncentracije je registrovan na teritoriji Bosne i Hercegovine.

3. Pravni okvir ocjene predmetne koncentracije

Konkurencijsko vijeće tokom provođenja postupka ocjene dopuštenosti predmetne koncentracije primjenilo je odredbe Zakona, Odluke o utvrđivanju relevantnog tržišta («Službeni glasnik BiH», broj 18/06) te Odluke o načinu podnošenja prijave i kriterija za ocjenu koncentracija privrednih subjekata.

Konkurencijsko vijeće je, na osnovu člana 43. stav (7) Zakona, koristilo sudsku praksu Evropskog suda i odluke Evropske komisije, kao i kriterije i standarde iz Obavještenja Komisije o računanju ukupnog prihoda u skladu sa Uredbom Vijeća (EEZ) broj: 4064/89 o kontroli koncentracije privrednih subjekata.

4. Pravni osnov i oblik predmetne koncentracije

Pravni osnov predmetne koncentracije je utvrđen, u smislu člana 16. stav (1) tačka a) Zakona u članu 8. tačka f) alineja 3) Odluke o načinu podnošenja prijave i kriterijima za ocjenu koncentracija privrednih subjekata.

Privredni subjekti Lexmark, Getter Group, Getter Tech i fizičko lice Ran Gil zaključili su Ugovor o međusobnim odnosima vlasnika udjela, dana 14. jula 2006. godine (u daljem tekstu: Ugovor). Ugovorom je predviđeno pravo opcije na kupovinu u korist privrednog subjekta Lexmark, koje se odnosi na udjele u kapitalu privrednog subjekta CEEmark, a koji nisu u vlasništvu privrednog subjekta Lexmark (odnosi se na udjele u kapitalu koji se nalaze u vlasništvu privrednih subjekata Getter Group i Gettar Tech i fizičke osobe Rana Gila).

Predmetni Ugovor je izmjenjen i dopunjen dana 14. novembra 2008. godine Ugovorom o izmjenama i dopunama ugovora o međusobnim odnosima vlasnika udjela (u daljem tekstu: Izmjene i dopune ugovora), koji je pravni osnov namjeravane koncentracije. Ovim Izmjenama i dopunama ugovora je utvrđeno da privredni subjekt Lexmark iskoristi svoje pravo opcije na kupovinu u smislu sticanja 74,0% udjela u osnovnom kapitalu privrednog subjekta CEEmark, te da prenos udjela u osnovnom kapitalu treba izvršiti dana 5. januara 2009. godine.

Nakon provođenja predmetne koncentracije privredni subjekt Lexmark će imati 100,0% udjela u osnovnom kapitalu privrednog subjekta CEEmark.

U skladu sa članom 12. stav (1) tačka b) Zakona pravni oblik koncentracije predstavlja sticanje kontrole (od privrednog subjekta Lexmark) u drugom privrednom subjektu (CEEmark) kupovinom udjela u osnovnom kapitalu.

5. Relevantno tržište predmetne koncentracije

Relevantno tržište koncentracije, u smislu člana 3. Zakona, te čl. 4. i 5. Odluke o utvrđivanju relevantnog tržišta, čini tržište određenih proizvoda /usluga koje su predmet obavljanja djelatnosti na određenom geografskom tržištu.

Prema odredbi člana 4. Odluke o utvrđivanju relevantnog tržišta u proizvodnom smislu obuhvaća sve proizvode i/ili usluge koje potrošači i/ili korisnici smatraju međusobno zamjenjivim, pod prihvatljivim uslovima, imajući u vidu naročito njihove bitne karakteristike, kvalitet, uobičajnu namjenu, način upotrebe, uslove prodaje i cijene.

Nadalje, prema članu 5. Odluke o utvrđivanju relevantnog tržišta, relevantno tržište u geografskom smislu obuhvaća cjelokupnu ili dio teritorije Bosne i Hercegovine na kojoj privredni subjekt djeluje u prodaji i/ili kupovini relevantnog proizvoda pod jednakim ili dovoljno ujednačenim uslovima i koji to tržište bitno razlikuju od uslova tržišne konkurencije na susjednim geografskim tržištima.

Relevantno tržište usluga predmetne koncentracije je tržište prodaje pisača.

Relevantno tržište u geografskom smislu predmetne koncentracije je Bosna i Hercegovina, s obzirom da učesnici koncentracije vrše prodaju na cijeloj teritoriji Bosne i Hercegovine.

Slijedom navedenoga, relevantno tržište predmetne koncentraciji je tržište prodaje pisača u Bosni i Hercegovini.

6. Analiza relevantnog tržišta predmetne koncentracije u Bosni i Hercegovini

Tržišni udjeli učesnika koncentracije i konkurenata na relevantnom tržištu, u 2007. godini, iznose:

Tabela 2.

R.b.	Proizvođač -marka pisača	Tržišni udio
1.	HP Hewlett-Packard - S.A.D.	56,8%
2.	Lexmark (preko privrednog subjekta CEEmark)	18,5%
3.	Canon - Japan	8,5%
4.	Samsung - Južna Koreja	6,0%
5.	Brother Industries- Japan	2,5%
6.	Kyocera Mita - Japan	1,7%
7.	Seiko Epson Corporation - Japan	1,6%
8.	Xerox - S.A.D.	1,4%
9.	Konica Minolta - Japan	1,0%
10.	Toshiba - Japan	0,5%
11.	Ostali	1,5%
	Ukupno	100,0%

Izvor: podaci iz Prijave

Najveći tržišni udio (Tabela 2.) na relevantnom tržištu ima privredni subjekt HP sa tržišnim udjelom od 56,8%, te privredni subjekt Lexmark, koji isključivo djeluje preko privrednog subjekta CEEmark, odnosno privrednog subjekta CEEmark BH i preko nezavisnih distributera.

Privredni subjekt CEEmark u Bosni i Hercegovini ima zaključene ugovore sa distributerima (veletrgovcima):

- NTCHS d.o.o. Sarajevo, Džemala Bijedića bb, 71000 Sarajevo;
- ALTERNA Intertrade d.o.o. Sarajevo, Ložionička 2, 71000 Sarajevo.

7. Ocjena predmetne koncentracije

Konkurencijsko vijeće analizom relevantnih podataka, u smislu člana 17. Zakona, ocjenilo je da provođenjem namjeravane koncentracije neće doći do stvaranja dominantnog položaja učesnika koncentracije na relevantnom tržištu i da ista neće sprečavati, ograničavati ili narušavati tržišnu konkurenciju na relevantnom tržištu. Radi navedenoga predmetna koncentracija ne stvara dominantan položaj te provođenje iste ne može uticati na sprečavanje, ograničavanje ili narušavanje tržišne konkurencije na relevantnom tržištu.

Također, Konkurencijsko vijeće je utvrdilo da se radi o vertikalnoj koncentraciji, uzimajući u obzir povezana tržišta učesnika koncentracije u Bosni i Hercegovini.

U postupku donošenja konačne odluke Konkurencijsko vijeće je imalo u vidu i prednosti koje namjeravana koncentracija ima u jačanju konkurencije na relevantnom tržištu, proširenju ponude prodaje pisača i sniženju cijena istih.

Prema navedenom Konkurencijsko vijeće je ocijenilo dopuštenom predmetnu koncentraciju, u smislu člana 18. stav (2) tačka a) Zakona.

8. Administrativna taksa

Podnosilac Prijave na ovo Rješenje, u skladu sa članom 2. stav (1) tarifni broj 107. tačka d) pod 1) Odluke o administrativnim taksama u vezi s procesnim radnjama pred Konkurencijskim vijećem («Službeni glasnik BiH», broj 30/06) je dužan platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

9. Pouka o pravnom lijeku

Protiv ovoga Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Rješenja.

Predsjednik

Ibrica Lakišić